

Nef regolament su la privacy ence per i fitacartieres

La sociazion à endrezà na scontrèda informativa per meter dant la novitèdes de chest setor

Sèn Jan - L'é stat n emportant moment de informazion e de formazion la scontrèda endrezèda da la Sociazion Fitacartieres de Fascia en jebia ai 25 de otober te sala de Consei de Comun de Sèn Jan che à binà n bel grop de operadores del setor.

Dantfora la presidenta Cristina Donei à metù en consaputa i sozi che col prum de jené del 2019 mudarà endodanef la steora de sojornanza per i fitacartieres che cognarà dèr jù 0,70 centesimes a persona per ogne not. Resta fora da l'oblig de paament i patrons de un cartier demò.

"Chest l'é chel che l'é stat deliberà – à dit la presidenta Donei – ma se sà che ades mudarà la Jonta provinciala e no saon se vegnarà tot altre dezijsion en merit."

Amò apede la presidenta Donei à fat a saer che l'Apt à azetà la proponeta de la sociazion, travers sia raprezentanta Iris Brunel, de aer n compart dedicà demò ai fitacartieres. Per chest sarà de besegn de aproèr n mudament al statut che vegnarà tout dant en ocasion de la radunanza de l'Apt che sarà ai 3 de dezember. I fitacartieres, sozi de l'Apt, é envié a tor pèrt de n gran numer percheche vegne aproà chest mudament.

La parola dapò é passèda ai esperc de QSA, na sozietà de consulenza che à sia sentes a Pardac, Trent e Busan e che é stac envié a la scontrèda per meter dant la novitèdes sul nef regolament de la privacy pervedù



La presidenta de la sociazion Fitacartieres de Fascia Cristina Donei ensema a Piero Mattioli che à spiegà la neva regoles su la privacy.

dal regolament european 2016/679.

L diretor tecnich de QSA Piero Mattioli à spiegà che l nef regolament su la privacy, jit en doura ai 25 de mé de chest an, à portà a na revolucion culturèla ajache l'é dut na lingia de novitèdes da osservèr per la sconanza di dac personèi de la persones. La privacy tel sens de resservateza o "derit de aer paze" no la é più (o beleche). L legislator european cogn se cruzièr de la protezion di dac personèi e de sia circolazion per favorir l marcìa digitèl a na vida che l sie più segur

e fidabol per i sentadins.

Che se cognel fèr per respetèr l regolament?

Ence i fitacartieres cogn osservèr chesta regoles ajache i trata i dac personèi de si clienc e i li met te la rei virtuèla, donca duc pel apede a chesta informazions personèles.

"Pissave che se pel calcolèr con modie virtuèi adertura l valor de l'identità de na persona – à dit Mattioli – che vegn valutèda aldò de cotanta persones che vel paèr per aer noscia informazions per dapò

ne contatèr con reclam de ogne sort."

L'é stat la espertes Samatha Pederiva e Annalisa Bosin a jir ite più tel detai del nef regolament su la privacy. L'é ben fat che duc osserve la regoles percheche vegn fat contro i sul teritorie e chi che no les respeta pel ruèr a cogner paèr na strafonga ence del 4% del faturat, les à dit.

L nef regolament disc che chi che trata dac personèi à l'oblig de informèr l'interessà che l'é en possess de si dac e l cogn ge fèr a saer coche l li dora.

Se anter client e fitacartier l'é demò n scambie de mail l'é assà che

junsom a la mail vegne dat l'informazion che si dac vegnarà traté aldò de che che disc l nef regolament. Canche enveze se vegn en possess de autres dac, desche chi per ejempie su la chèrta de identità, ge volarà ge fèr sotescriver al client l consens per i durèr, ence tel cajo che se envìe via na azion de marketing.

"Ogne situazion aboncont é desvaliva l'una da l'otra – à spiegà Samantha Pederiva – e per chest l'é emportant che vegne svilupà n percors su misura, no l'é a la leta soluzion "chiaf te man". Chest percheche l'é ence caji olache più che na persona pel ruar en contat coi dac personai che l'é te computer, podessa esser na persona de ciasa che deida te la gestion de le prenotazion, l tecnich de computer, l comersialist." Da tegnir cont ence che i messajes mail é gestii da piataformes e cloud che no é sot nosc diret control; duc fazile recorda l fat sozedù del 2011 canche 150 mile utenc de google gmail à perdù duc i messajes de posta eletronica per n bug tel sistem.

Te sala i fitacartieres à domanà che che ge vel fèr concretamenter per respetèr la regoles del nef regolament su la privacy. La presidenta Donei à dit che à duc ge vegnarà manà per mail n strument de carater generèl per i besegnes più scempies che cognarà vegnir aboncont adatà da ogne un aldò de sia situazion.

Monica Cigolla